



wantok

NESENEL

Niuspepa bilong ol Papua Niugini stret

Namba 202

Bilong wik i stat long 21 Janueri 1978

Prais 10t.



Don Hatcher poto.

Long ples Ialibu long de namba 15 bilong Deseмба, Bisop Firmin Schmidt, O.F.M., Cap., bilong Mendi i bin givim sakramen bilong ordo long Simon Apea Soge na olsem em i bin kamap namba wan lokal Katolik pris long Saten Hailans.

Bisop George Bernarding, S.V.D., bilong Maun Hagen na 65 pris i bin join long dispela bikpela lotu. Samting olsem 5,000 pipel tu wantaim olgeta bilas bilong tumbuna i insait wantaim ol, bihain long ol i bin winim tripela de olgeta long selebren na redi long dispela bikpelande. Tripela lokal Katolik pris i bin stap wantaim ol: em long Pater Philip Norrie na Mark Wom na Robert Maki bilong Mt. Hagen daiosis na Pater Louis Ambane bilong Goroka daiosis. (*I go moa long pes 11.*)

Kirap long lephan long poto yu lukim: Fabian Amburel, Pater Simon, Apea Soge, Undi Nandi

**NAMBA WAN
PRIS LONG
S. HAILANS**



*Kirap long lephan na yu
ken lukim Ofisa Paul Ko-
dor, Emmanuel Bai Kaki-*

*do, na Yichyaman Waeda,
Tripela i bilong ami na i
tren nau long pailot long
Australia.*

*Poto daunbilo i soim
Ofisa Paul Kodor gen in-
sait long rum draiv bilong
DC-3.*

Tupela poto bilong Royal
Australian Air Force.



wantok
Papua New Guinea's
own national weekly
in Melanesian Pidgin

**Papua New Guineans'
own national weekly
in Melanesian Pidgin**

Editorial Offices:

Box 1982
Boroko
Phone: 25.2214
25.2552
Telex: NE 22213

Branch Offices:

Wewak
Phone: 86.2479

Wabag
Box 111

**Australian
Advertising
Representative:**

Kevin Engel
8 Duraba Pl.
Caringbah (2229)
N.S.W.
Phone: 525.6263

Subscription rate:

Annual: K8.00

TOK BILONG OL PIPEL YET

Mipela wokman bilong Wantok niuspepa i amamas tru long soim mipela i bilipim tru het tok i stap antap long pes wan, aninit long nem Wantok. Em i tok olsem: Wantok i niuspepa bilong ol Papua Niugini stret. Em i trupela tok.

Bilong redi long dispela namba wan niuspepa bilong dispela yia 1978, mipela i bin ritim 208 pas i bin kamap long yupela ol rida. Yu save em i min wanem samting? Em i min hia long Wantok niuspepa yupela ol pipel i bin painim wanpela ples we yupela ken autim wari na tingting na laik na askim bilong yupela, yupela i no mas skul long tok Inglis pastaim. Nogat.

Bikos mipela i bin kisim planti pas olsem, dispela taim mipela i prinim 4-pela pes olgeta pulap long pas i kam long ol pipel tasol. Bai yu ken lukim ol i ting wanem. Bai yu ken lukim ol i kam long olgeta hap bilong Niugini na Papua tu. Yu no ken ting ol Papua i tok Motu tasol. Nogat tru. Planti moa ol i save tok Pisin pinis. Yu ritim tasol sampela pas hia insait, em ol Papua yet i bin raitim.

Sapos yupela i laikim olsem, orait, yupela i tok tasol na olgeta taim mipela i ken givim moa spes na pes long rait bilong ol pipel yet. Sampela taim ol aidia bilong ol i skrapim bel bilong yumi, i mekim bel i paia, i mekim kol bel. Sampela pas i gutpela; sampela i krangi. Tasol maski - mipela i larim ol olsem. Mipela i no save senisim. Nogat tru. Sapos man i tingting krangi, mipela i wet bai ol rida i stretim em.

Sampela kain pas tasol, mipela i no save prinim. Mipela i no laikim pas i gat tok sem o tok nogut insait long en. Mipela i no laikim pas we wanpela lotu o misin i pait wantaim narapela. Mipela i no laikim pas we man i belhat na i sutim tok kwik-taim tumas na putim hevi long olgeta man bilong wanpela sios, o wanpela dipatmen bilong gavman, o wanpela skul, o wanpela haus sik. Mipela i no laikim pas i krungutim gutnem bilong arapela man. Sapos mipela i prinim dispela kain, mipela inap kot.

Inap 7-pela yia nau mipela i bin ritim ol pas i kamap long han bilong ol rida. Na tude mipela i ken tok olsem: Man, ol pas nau i win tru long ol pas bilong bipo. Bipo planti praimer skulmanki tasol i traim rait. Nau ol bikpela manmeri, planti haikul studen, sampela memba bilong palamen, sampela minista yet i save rait. Na yu tingim dispela samting yet: i no gat wanpela man i bin skulim ol dispela manmeri long rait long tok Pisin. Bilong ol yet ol i mekim - na i mekim nambawan tru.

Em i min, yu no mas skul long dispela tok Pisin; em i samting i kamap long bun na skin bilong ol Papua Niugini yet.

Em i samting bilong dispela kantri stret.

SALIM SKWATA I GO BEK

Andy Supeke i raitim

Hetman bilong Isten Hailans Provinsal Gavman, Mista James Yanepa i bin tok long mun Desemba, em bai rausim ol Not Solomons pipel ol wok long Isten Hailens.

Em i bin tok olsem bihain long Not Solomons Provinsal Gavman i bin salim 20 Hailens pipel i go bek long ples bilong ol, long wanem ol i no gat wok.

Minista bilong lukautim ol provinsal gavman, Pater Momis, i makim wanpela miting long dispela wik long Port Moresby bilong ol hetman bilong ol provinsal gavman bai ol i ken painim we bilong stopim skwata trabel long olgeta hap long Papua Niugini.

Long dispela taim Pater Momis i tok olsem, Not Solomons i no bin salim nating sampela Hailens pipel i go bek long ples. Nogat.

Em i tok planti Hailens pipel ol i bin tokim Not Solomons Gavman, ol i laik i go bek long ples. Olsem na balus i kisim ol i go.

Long dispela bikpela miting planti memba i tok, salim pipel i go bek long ples bilong ol i no inap long stopim dispela skwata problem.

Nesanel Gavman i no bin statim gut sampela bisnis long ol liklik ples. Olsem na ol pipel i les long stap bek long ples we ol i no gat wok.

Ol deliget i tok, Nesanel Gavman i no bin stretim yet polisi bilong en long kamapim developmen long ol liklik ples.

Sampela i tok, i no Nesanel Gavman tasol. Ol lida long Papua Niugini i mas wok hat wantaim long kirapim developmen long

ol liklik ples.

Bihain long dispela miting, ol bai makim 5-pela man olsem spesel komiti bilong stretim wari bilong skwata problem.

Sampela memba tu i laik bai Gavman i mas kirapim nupela ministri long lukautim skwata problem.

Nesanel Gavman i bin givim K20,000 long gavman bilong Not Solomons long helpim em long bringim bek ol Hailans na arapela pipel i no bilong Not Solomons na i no gat wok na i laik go bek long ples. Tupela moa balus i bin wet long bringim sampela moa i go bek, tasol dispela tok kros i kamap.

PE LONG HAUS SIK GO ANTAP

Bill Kuamin i raitim

Long namba wan de bilong Desemba pepa bilong autim olgeta lo bilong gavman, em ol i kolim "National Gazette" i bin makim ol nupela pe bilong baim haus sik long ol bikpela taun.

Inap nau planti minista na planti memba bilong palamen na planti pipel i bin kirapim nogut tru long dispela nupela lo, em Minista bilong Helt, Mista Wiwa Korowi, na dipatmen bilong em i bin bringim.

Ol dispela nupela lo i go olsem:

- (1) Bipo man/meri i gat sik na i mas kamap slip long haus sik, em i mas baim K2. Maski em i stap hamas de o wik. Nau pe em inap long K5.
- (2) Bipo man i kam kisim marasin tasol, o i kam bilong ol i pasim sua, wan wan taim em i mas peim 20t. Nau em inap long 50t.
- (3) Bipo man i stap long haus sik wantaim bikpela sik tru na em i go long "intermidiet wod", em i baim K3.60 o K8.40 o K10.40 long wan wan de. Nau em i mas baim long K20 long wan wan de.
- (4) Sapos dokta i mas katim man bilong fiksismolpela sik, bipo dispela em i fri. Nau sikman i mas baim long K35. Na sapos dokta i mekim bikpela wok tru long katim man na stretim sik, bipo dispela tu i fri. Nau em i ken kostim inap K100.
- (5) Eksre (X-ray) - bipo i kostim K3.60 inap K4. Nau em i ken kos inap long K10, sapos em i bikpela eksre. Sapos em i pablik eksre, nau ol i baim long 50t. Bipo em i fri.

Long sampela taun olsem Moresby, na Madang na Hagen na Wewak ol pipel i bin bung na mas na tokaut strong egens long dispela nupela lo. Planti memba bilong palamen tu i egens na i tok, em i no stret long putim hevi long tarangu sikmanmeri. Bai i gat planti toktok moa long dispela samting long mun Februeri, taim palamen i kibung long Port Moresby.

PAS I KAM LONG OL PIPEL

ROT BILONG KAGO

Dia Edita,

Mi laik bringim wari bilong mi o tok klia i go long Mr. M.P. Charles long Pomio E.N.B..

Wari bilong mi i go olsem. Yes, mi bin ritim wanpela Wantok niuspepa na mi lukim Mr.M.P. Charles i raitim, klostu olgeta long hap bilong Pomio Sab-Propins i sapim diwai na sanapim long namel long ples. Na ol i raitim 10-pela lo bilong God long en olsem dispela God i givim long Moses long Maunten Sinai.

Na tu ol i tambu long kaikai buai na ol i klinim matmat na wokim haus long em. Ol i tok em i haus bilong ol man indai. Long Fonde ol i save kilim pis o pik o abus nabaut na putim long haus hia long matmat. Na sampela samting olsem, ol i save was long ol ovasis sip na i tok sip bilong ol tru.

Yes, Mr. M.P. Charles mi ting dispela kain pasin em i Pasin Kago Kal.

Long bipo God i wokim heven na graun, em bin wokim wanpela man na

meri. Taim God i rausim tupela long gaden o Paradis, em i tokim meri olsem, "Yu bai karim pen na karim pikinini". Na em tokim man olsem, "Yu skrapim han bilong yu o kisim tuhat, na bai yu painim samting".

Olsem na yumi man bilong graun save trai hat tru long painim ol samting. Sapos yumi i stap nating na mekim kain pasin olsem long Pomio Sab-Propins mi ting bai yumi no inap painim samting.

Em tasol wari o tok klia bilong mi.

Francis A. Tunamba
AGI Lae

WATPO NO LAIKIM OL RETSKIN?

Dia Edita,

Yes, mi harim planti taim ol Solomons manmeri ol i save tok olsem long ol Retskin. Ol i tok, mipela mas rausim ol na ol i go bek long ples bilong ol. Na mipela nambis man tasol bai mipela wok long dispela Kopa maining o ol wok nabaut.

Tasol mi ting olsem, bipo ol dispela taun Kieta na Toniva na Arawa na Panguna i no i stap olsem.

Draipela bus tru i stap. Na ol retskin tasol i katim bus na kamap taun. Nau yu husat Solomons o Nambis man yu pulim sokis na putim aiglas nabaut, em yu nau tasol i kamap na yu hambak long rausim ol retskin?

Na tu ol Hailans ol i kam askim wok nabaut long ofis na husat nambis man i stap long ofis em i askim ol hailans olsem, "Yu bilong Hailands o nambis, em ol i kisim em long wok. Na ol i tok long Hailans, na ol man i stap long ofis em ol i tok, sori tasol na em i tok long nogat spes i stap.

Na Hailans man em i kam bek long haus na sampela ol i tok, "Man asde yu go askim wok na ol i no kisim yu a? Tasol nau mi lukim em i kisim wanpela man pinis long dispela wok."

Em dispela kain tok tok nau ol lain Awi ol i save tok olsem. "Mipela lain Awi i lukautim meri pikinini na ol gaden haus samting long bus. Na Boga yu save wok long taun.

Em tru ol tok olsem na i pulap tru antap long kem 5 antap long bus ol i slip nabaut i stap. Em ol lain Awi tasol.

Em tasol liklik wari bilong mi. Em pinis nau.

E. Namba Rang,
Mt Hagen.

MISIS I RAIT LONG AUSTRALIA

Dia Edita,

Plis mi laikim bai yu-pela i brinin pas bilong mi i go long Wantok Niuspepa.

Planti yia tumas i go pinis long taim wanpela waitman na meri em tupela i stap long Lamasong plantesen long Nu Ailan. Nem bilong tupela olsem Purlok (FURLONG).

Long haus, tupela boi i lukautim na stretim ol samting bilong masta, misis na pikinini meri. Wanpela em i gutpela tru, nem bilong en PETRUS. Dispela i nem bilong Katolik misin. Man i gat trupela nem bilong Sepik. Sori tumas mipela lusim nem.

Long de bilong Krismas 1941, nupela pikinini meri bilong mi i gat 5 mun tasol. Long dispela de gavman em i toktok long pas. Dispela pas wanpela boi i kisim i kam long Kavieng hariap tumas. Pas em i tok: "Japan man i

kamap pinis. Nau olgeta meri na pikinini i mas go long salwara long Australia. Olgeta man i mas stap long lukautim plantesen."

Na taim mi na pikinini meri i mas go mipela i pret tumas na sori tumas long pikinini. Ulupatun, sip bilong misin, i stap long hap tasol haiwara tumas i stap namel.

Orait, Petrus i toktok long mi olsem: "Yu laik mi was long pikinini na karim i kam long sip? Yu-tupela pikinini i no save wokabaut long haiwara."

Orait, gutpela tru, Petrus em i mekim olsem. Bihain Petrus i go bek long nambis, na mi no lukim em moa.

Mi lapun meri nau na mi tingting Petrus nau i gat 60 yia nabaut, sapos em i no dai pinis. Mi laik tumas harim tok save long dispela gutpela Petrus. Em i pren bilong mipela tru.

Nau pikinini meri bilong mi i gat 36 Krismas. Em i save tok olsem tude: "Long taim ol Japan man i rausim yumi, Petrus em i wasangelo bilong mipela".

Sapos husat manmeri i save long dispela lapun Sepik, mipela i laikim tumas em irait long Wantok niuspepa. Tenkyu.

(Mrs) Kit McMullen
(Furlong).

SALIM OL
PAS I KAM
LONG:

WANTOK
BOX 1982
BOROKO

BAIM WANTOK

Sapos yu laik kisim WANTOK niuspepa i kam long yu stret olgeta wan wan wik bilong dispela yia, yu katim dispela tiket long sisis na salim i kam wantaim K8.00.

NEM BILONG YU:.....
ADRES BILONG YU:.....

Salim sek o mani oda inap long K8.00 wantaim dispela tiket i kam long:

WANTOK
BOX 1982
BOROKO

Sapos yu bilong wanpela skul o misin o grup na yu laik kisim moa olsem 10-pela WANTOK wantaim long olgeta wan wan wik, orait yu rait na askim mipela long spesel prais mipela i gat long man i baim planti WANTOK olsem.



NAMASU

P.O. Box 615
LAE

Ring: 42.4200

Kampani bilong yumi



NAMBAWAN TIN PIS



NIUS BILONG OL MERI



HELPIM OL MERI GO HET

Presiden bilong Milne Be Kaunsil bilong ol Meri, Misis Erna Pita, i tok em i no laik lukim planti smolpela asosiesen bilong ol meri nabaut long kantri i pinisim wok bilong ol - kamap wanpela bikpela oganaisesen tasol. Em i ting ol meri long wan wan provins i ken helpim moa moa yet long wokim ol program bilong-helpim gutpela sindaun bilong ol famili bilong ol.

Misis Pita i bin tok olsem, long taim Minista bilong bosim wok namel long ol meri, em Mista Pato Kakarya, i bin lukluk raun inap long tupela de stret insait long Milne Be Provins.

Misis Pita i tokim minista long wanpela miting long Alotau olsem: Mipela meri i save pinis bai oltaim i gat sampela wari bilong sindaun bilong ol famili na ol yangpela pipel. Olsem na gavman i mas sapotim ol wok na skul olsem Ahioma Trening Senta - we ol i save skulim ol papamama na ol pikinini wantaim. Em i gutpela kain skul tru.

Em i tokim Minista olsem: dipatmen bilong em i mas wari long helpim go het gutpela sindaun bilong olgeta meri bilong olgeta provins bilong Papua Niugini.

Insait long ol liklik ples long bus ol meri i sot yet long planti kain samting, na sindaun bilong ol i nogut. Olsem ria yumi mas tingting long ol yet.

SINGER



**PREN
BILONG YU
INAP OLTAIM**

© The Singer Company



Veronika Williams photo

MIS PAPUA NIUGINI 1978

Mis Angelyn Tukana, i winim resis na kamap Mis Papua Niugini long de 10 Disemba 1977 long Papua Hotel long Port Moresby. Mis Tukana i winim 9-pela arapela meri.

Mis Tukana em i wanpela hostes o boskru long bikpela 707 foa ensin smokbalus bilong Air Niugini. Long mun Novemba, Wantok Niuspepa i putim poto bilong Angelyn long kava.

Prais long winim dispela resis, em i K500, sampela gol bis bilong nek na wanpela dres, kos bilong en K500.

Long mun Mas bai Angelyn i go long Melbourne long Australia long sanap insait long narapela resis long painim Kwin bilong Pacifik.

Bihain gen em bai go long Manila long Filipin Ailans long narapela resis long painim Mis 'Esia.

Mis Tukana i gat 21 krismas na i kam long viles Suhin long Not Solomons Provins.

PAS I KAM LONG OL PIPEL

SAPOS MERI I MAN NA MAN I MERI

Dia Edita,

Mi laik toktok long man i brukim marit o em i pilai long meri tasol.

Harim gut, toktok i go olsem, sapos yu husat man yu marit long wampela meri na yutupela i go long haus lotu na pris i givim yutupela long ring na promis tru long ai bilong God. Na bihain sapos yu tupela i kam long ausait na yu yok: "Ha! Promis na ring em i samting nating." Na yu brukim marit, o yu rausim dispela meri na yu kisim narapela meri, o yu maritim dispela meri bilong tude na tumora yu painim narapela meri gen.

Brata, dispela pasin i no stret long ai bilong God, na ai bilong ol wantok bilong yu.

Brata, nau yu save, em meri i no dok o pik bai yu ken pilai long em tasol. Nogat. Meri em i gat laip

na spirit i stap insait long em olsem yu man tasol.

Brata, mi ting sapos yu man, yu kamap olsem meri, na ol meri ol i kamap olsem yu man. Na sapos ol i tokim yu olsem, ating bai yu wari tru ya, laka.

Ol brata, yupela i mas tingting gut. Meri em i no pilai bilong yu. Yu save, meri em i wokim bikipela hatwok tru long yu man. Em i kukim kaikai. Em i karim botol bilong go kisim wara i kam na yu dring. Na em i go long garden na kisim kaikai.

Em i gat bel na i karim pikinini bilong yu, na draipela pen tumas em i karim.

Man, ating sapos yu kauntim wok bilong ol meri, bai i winim bilong yu man ya, laka!!

Orait, nau yu mas tingting gut long dispela

Peter Luvongit
Kandrian, W.N.B.

OL PAPUA RAITIM TOK PISIN

Dia Edita,

Mi laik autim liklik wari bilong mi long Wantok nius. Orait, ol man-meri o kaunsil bilong provins bilong mi bai lukim. Olsem na hia nau mi autim wari bilong mi.

Wari bilong mi em i olsem: mi save lukim long olgeta hap long PNG maket bilong ol i save i stap gut, long wanem kaunsil bilong ol i save wok hat tru. Tasol ol kaunsil bilong Noten provins i save slip tumas na tu les long wokim wok mani bilong ol.

Olgeta rabis o pipia insait long maket em i diuti bilong ol kaunsil. Tasol long maket bilong Noten ol i save pulap long pipia o rabis. Ol kaunsil i save pasim maket i go inap olsem wan o tu wik.

Em i no gutpela pasin. Ol taun man ol i save kisim

kaikai long maket na ol i kaikai isi i stap taim ol i pasim maket, trangu ol taun man i no gat rot bilong painim kaikai.

Bipo nem bilong maket bilong Noten i winim olgeta maket, tasol nau nem bilong Noten maket i daun pinis. Ol kaunsil yet mekim asua na maket i bagarap pinis. Na tu taun kaunsil bilong Noten i slip tumas na Popondetta i kamap bus pinis. Olsem na hia mi autim wari bilong mi long Wantok Nius.

A.K. Ansey Gauteba
Popondetta.

ODELI I WARI

"Dia Edita - Plis long hia mi laik autim wari bilong mipela olgeta A.P.O. long Papua Niugini.

Mipela ol A.P.O. i gat wari olsem bilong wanem tru mipela i bin traim hat tru long wok. I luk olsem

A.P.O. long olgeta hap bilong PNG i gat laik long gavman o i mas givim sampela promosen long mipela.

I no stret long ai nating long wanem, mipela ol sampela doktaboi i gat planti eksperiens pinis na stap longpela taim long wok. So i soim olsem gavman i mas givim bel na tingting long mipela tarangu.

Hamas yia mipela i bin i go kos na hamas taim promosen ol i makim long mipela. Nogat tru.

Sikman long bus mipela i stretim long banisim bikipela haus sik. Long dispela mipela tarangu stap long bus i painim hat long olkain samting olsem long taun.

Em tasol ating nau olsem long toktok bilong promosen bilong ol A.P.O. long PNG.

Francis Waipae,
Nuku/W.S.P.




YAMAHA OUTBOT MOTA

ELA MOTORS LIMITED

K998 - bilong moto i gat sotpela sap
K999 - bilong moto i gat longpela sap

Dispela moto i gat strongpela bun tru bilong ranim ol bot
bilong lukautim pis na bilong karim kago.

OLGETA MOTO I KAM WANTAIM LIKLIK KES I GAT SPEA PAT




PORT MORESBY P.O. Box 75 TEL. 25 4088	KIETA P.O. Box 468 TEL. 95 6083	WEWAK P.O. Box 581 TEL. 86 2255	LAE P.O. Box 91 TEL. 42 1568	MADANG P.O. Box 110 TEL. 82 2188	RABAU P.O. Box 712 TEL. 92 1388
---	---------------------------------------	---------------------------------------	------------------------------------	--	---------------------------------------




Poto long raihan i soim Mista Kopi Maro, wanpela ofisa bilong Aprentis Bot bilong Dipatmen bilong Leba. Em i skul inap tri mun long Australia long ol pasin bilong bosim ol aprentis. Hia em i sanap wantaim aprentis Wayne Gibbs long wanpela skul bilong prin we ol i save skulim 1000 aprentis long olgeta wan wan yia.

Poto daunbilo i soim Mista Roger Ralai bilong Ofis bilong Infomesen. Em i man bilong kisim poto na i stadi inap 10-pela wik long Sydney long olkain pasin bilong kisim na wasim ol poto.

Tupela poto bilong Australian Infomesen Sevis. Terry Rowe i kisim poto antap. Bill Payne i kisim poto daunbilo.



PAS I KAM LONG OL PIPEL

RAUSIM HAN LEK

Dia Edita - Hia nau wari bilong mi i go olsem. Mi laikim yupela i bringim wari bilong mi long Wantok Niuspepa. Wari bilong mi i go olsem:

Mi lukim ol yangpela man ol i wokim posin long han bilong ol, na kilim indai manmeri na pikinini.

Long hap bilong Maprik i no gat planti man na meri. Husat bai i wok long kaunsil na kirapim kom-yuniti long hap bilong Maprik?

Planti man na meri ol i kristen na i tok mi kristen

ya. Bihain ol i posinim yangpela meri o man insait pinis.

Mi ting olsem sapos husat man i mekim posin, lo i mas givim bikpela hatwok moa, long wanem, em i kilim planti manmeri pinis.

Lo i mas rausim hap lek o han bilong posinman, bai olgeta pipel i ken save long em.

Em tasol. Yu husat man long Maprik o narapela provins, yu laik helpim toktok bilong mi, bai mi amamas tasol long ritim Wantok Niuspepa.

Gregory J. Garasau,
Maprik/E.S.P.

PASIM ROT KRISTEN

Dia Edita,

Hia mi laik bekim pas bilong wantok hia Philip Monde long mun Ogas numba 6.

Orait, presn, yu tok taim yu raun long Port Moresby, Rabaul, na Lae yu lukim pasin pamuk i go bikpela tru. Na yu tok i no gat wanpela minista i save toktok long dispela samting, na i bagarapim sindaun bilong ol manmeri husat i sindaun kristen laip.

Philip Monde, mi amamas long tok bilong yu, long stopim pasin pamuk. Orait, nau mi laik askim tingting bilong yu, yu ting wanem? Olgeta Papua Niugini ol i kam kristen kantri pinis?

Sori, brata, nogut yu tok nating na semim kantri

bilong yumi. Orait, watpo mi tok olsem long yu, yumi no kamap kristen kantri? Planti samting i pasim rot bilong yumi. I no pasin pamuk tasol i bagarapim sindaun bilong yumi.

Philip, yu stapim pasin pamuk, na watpo yu no stopim ol narapela samting i save kamap long Papua Niugini? Nau mi laik askim yu wanpela askim olsem: Philip, yu inap wokabaut inap 3 mail long nait? Yu inap? Sori, mi ting sampela i lukim yu long rot na ol i mas kilim yu. Na yu ting wanem? Kilim man i bigpela or pamuk i bikpela samting? Stilim K1,000 i bikpela samting o pamuk i bikpela samting? Mi no save, tasol mi askim yu tasol.

Na olsem wanem long ol yangpela manmeri bilong nau, yu ting olgeta i go insait pinis o ol i kamap kristen? Insait long Papua

Niugini Kristen laip bilong yumi em i dring na spak.

Brata, bipo yumi tok tok, pastaim yumi mas lukluk o tingting na bihain yumi ken tok. Nogut yumi haitim ol samting rabis, na bai yumi toktok long wanpela samting tasol, pamuk, stil, kilim man, brukim stua, na Raskol i save paitim man long rot. Wantok, sapos yu tok long ol man bilong gavman o gavman minista em i orait. Yu no ken putim wanpela samting tasol long ai bilong yu na bikmaus long em.

Sori, pren, mi laik pinisim tok bilong mi na mi laik tok olsem long yu, mi no helpim bisnis pamuk, nogat. Tasol mi wari watpo yu no autim olgeta ol dispela rong samting.

Gabriel Gim
Rabaul



**MUSIK
KASET**

K3 TASOL

**KAIN KAIN MUSIK OL MANMERI BILONG
PAPUA NIUGINI LAIK HARIM**

Sapos yu laik baim sampela kaset, yu salim dispela pas i kam long:

National Broadcasting Commission
P.O. Box 6518, Boroko

Yu mas makim olsem **1** wanem kaset yu laik baim na tu hamas kaset yu laik baim.

Salim sek o mani oda (bilong pos ofis) wantaim tiket i stap daunbilo i kam long mipela. Wan wan kaset i kostim K3.00 stret.



☐ The Davara Band	☐ Pairap Bilong Gita Vol. 1
☐ The Islander Band	☐ Pairap Bilong Gita Vol. 2
☐ New Krymus Band	☐ Hiri Gita Vol. 1
☐ P.N.G. Gita	☐ Hiri Gita Vol. 2
☐ From Bismark Sea	☐ Karai Bilong Tumbuna
☐ Singing Lotu	☐ Danis Bilong Tumbuna

Mi laik baim _____ kaset mi bin makim.
Nau mi salim mani K. _____ i kam wantaim pas.

Nem:

Adres:

PAPUA NEW GUINEA AUSTRALIAN RULES FOOTBALL COUNCIL

RAFEL NAMBA TRI

1 Prais: Mazda 323 Sedan ka
2 Prais: Tupela tiket long balus i go long Manila. Air Niugini i givim.
8-pela arapela Prais: 8-pela Sanyo Transista radio
Spesel Prais: K200 long man/meri i win long salim planti buk tiket

OLGETA PRAIS WANTAIM INAP LONG K 6,000.

Bai ol i mekim dispela rafel long Boroko Polis Stesin long 21 Mas 1978 na ol bai prinim ol nem long "Post Courier" na long "Wantok". Distrik Komisina i orait long dispela rafel.

Tupela bikpela wina bilong Rafel Namba Tu em hia: Mista Robert James Kosboton bilong Masaher Ailan i winim Mazda ka. Na Epere Mipari bilong Port Moresby i winim tupela tiket bilong balus i go long HongKong.



Salim i go long: PNG Australian Rules Football Council
P.O. Box 1634, Boroko

Plis salim..... tiket i kam. Wan wan i kostim 50t.
Plis salim buk tiket i kam. Wan wan buk i kostim K 10, na i gat 20 tiket

NEM BILONG MI:

ADRES BILONG MI:


Mi salim nau sek/stem/mani oda i kam wantaim dispela tiket.

Man, wasket bilong yu
i wel tru, ya

Tru tumas. Em dispela
kaparesa Gillette i bin
mekim olsem



GILLETTE BLUE BLADE



I no gat wanpela kaparesa inap long winim dispela i gat nem Gillette Blue Blade.

Yu ken sev planti planti taim moa long en. Na em i rausim maugras i go olgeta, na wasket bilong yu i lait moa. Em nau. Yu go baim sampela long stua. Yu traim.

DISPELA KAPARESA I GO, I GO I GOOOOOOOO NA I NO LUSIM SAP.BILONG EM KWIKTAIM. I OLSEM TASOL.

SHAVE AFTER SHAVE AFTER SHAVE

PAS I KAM LONG OL PIPEL

NO KEN SUTIM KUMUL

Dia Edita - Mi laik autim liklik wari bilong mi. Wari bilong mi i go olsem: Mi save lukim ol yangpela boi ol i save wokim katapel long gumi na ol i save ronim pisin na kilim ol.

Dispela i no gutpela tumas long ai bilong mi. Bikos pisin kumul i bikpela samting o impoten long yumi long PNG.

Plis i no ken kilim ol, bikos ol dispela pisin kumul long PNG mipela i gat 32 ol kain kain pisin kumul.

Ol arapela kantri ol i gat liklik. Tasol PNG i winim ol. Olsem na mi autim wari bilong mi long ol pisin. Em tasol.

Anis Okopa,
Port Moresby.

OL NES STRONGIM TOK BILONG OL MAN

Dia Edita,

Nau mipela laik bekim pas bilong susa ya Bensa Bala bilong Lae. Yes, susa, gutpela tru olsem yu maritim masta, tasol yu tingim sindaun bilong yu long bihaintaim.

Yu ting yu moa yet na yu laik krosim Paulus. K. Tasol long sampela hap

long PNG ol sampela manmeri tu istap long sait bilong Paulua K.

Dispela yu tok olsem, ol PNG man gat liklik save na ol masta i gat moa save, em yu min olsem wanem? Yu ting ol i gat liklik save na ol i stap nabaut long PNG tasol, a? Sori, nogat ya. Ol PNG man i gat moa save olsem ol waitman na save i go raun long olgeta hap long world.

Susa, sapos yu gat radio, oke opim i go long NBC na bai yu harim long nius olsem ol PNG man i go long arapela kantri long save bilong ol yet. Maski long opim radio bilong yu long pop music tasol na tingim planti long waitskin man. Yu no wanpela waitskin meri, na krosim ol PNG man olsem.

Sori, susa yu mas pilim bikpela sem long ol tok yu binmekim long Paulus K.

Sapos yu wari tru long dispela pas mipela i bin raitim, oke yu susa ya Bensa Bala, i ken rait i go long Edita na em i ken printim long Wantok nius. Tasol mipela 6-pela nes i redi long bekim pas bilong yu. Tenkyu Tru.

Salome B
Rosey N
Wendy U
Vero B
Dorothy G
Judy D

Kudjip Haus Marasin
Banz W.H.P.

TOK AMAMAS LONG OL POLISMAN

Dia Edita,

Mi laik autim wanpela wari bilong mi i go olsem. Planti taim mi save harim long radio, ol man bilong pablik sevan, minista bilong Haus Palamen, ol man, na ol man i wok long ol kampani, ol i save tok bilas moa long ol Polisman.

Na bihain gen ol i tanim gen ol i kam krai long polis long narapela man i paifim ol, na pulim meri, stilim samting bilong ol. Na krai gen long laikim planti polisman long go long hap bilong ol. Tasol ol i no save marimari na toktok strong long gavman bilong mipela long stretim wari bilong polis, olsem givim bikpela mani i go long ol polis.

Sampela polisman i save lusim meri pikinini bilong ol inap planti mun. Sampela i save wokabaut long lek na hange wantaim. Tasol ol i no save wari long dispela ol samting. Tasol yupela save tok bilas long ol long wanem samting tru?

Mi ting olsem, sapos i no gat polis, bai yupela i no gen go long narapela hap long wok na skul. Plis, yupela mas tingting pas-taim na bihain toktok. Yupela ol man i save holim ben pena na pensil. vupela

i save paulim mani bilong gavman na ol kampani. Tasol ol polis i no save tok bilas long yupela. Mi no save, ating ol i save tambuim ol long toktok o olsem wanem?

Mipela i save slip, sindaun gut wantaim ol famili bilong mipela. Tasol ol tarangu i no gat. Ol i wok wantaim nait. Ren, na hange wantaim. Tasol ol i tingim sindaun bilong mipela.

Long yia 1975 mi bin askim wanpela polisman taim ol i kam lusim ka long rot klostu long hap bilong mi na ol i go long Manderes plantasin. Ol i wokabaut tasol long lek, kisim ol man. Na wokabaut i no klostu, bihain painim bot, baim pinis wantaim ol man bilong kot, baim PMV ka i go long nait. Mi askim ol olsem: "He, yupela save amamas long wok bilong polis long wanem?" Taim em i wok long kaikai drai kokonas, em i tokim mi olsem: "Em i wok bilong mi, na mi amamas long painim ol man i wokim trabel." Na mi sori long em tru taim i kaikai drai kokonas.

Plis, yupela ol man bilong sindaun long ofis na lukim buk na pulim su sokis, maski long toktok bilas long ol. Yupela, yes, i save kisim bikpela mani.

sindaun long gutpela haus, ron long ka, na bihain stilim moni bilong mipela gen.

Em tasol wari bilong mi, sapos husat pepaman i bel hat o wari, rait i kam.

J. Danuelin
Rabaul.


MERI BEKIM NAU


Dia Edita,

Olgeta taim ol man i save raitim pas na komplem long ol meri putim longpela trausis, siot, hanwas bilong ol man, maritim masta, katim gras long ai, putim lip stik na pentim pinga.

Mi bin lukim pas bilong Alex S. Ponolan i bin toktok long dispela. Pren, yu wari, yu bagarap. Mi ken tokim yu stret, em yu jeles tasol long wanem samting ol man i putim, mipela ol meri i ken putim tu na samting mipela ol meri i putim, yu i no nap long putim. Olsem na yu belhat. Em wari bilong yu. I no gat lo i tok ol meri i no ken putim ol dispela samting. Nau opim ai bilong yu na ritim; Man, meri em i bun bilong yu. I no gat wanpela man long PNG i save stap nating na i no dai. Planti i save trai hat long painim meri long painim senis bilong yu taim yu dai.

Moipa
Mt Hagen.





WIWA KOROWI

MINISTA BILONG HELT Membra bilong Saten Hailans

Mista Wiwa Korowi, Minista Bilong Helt na memba bilong Saten Hailans, em i bilong Komoli Vilis, i gat 30 krismas.

Long 1957 - 59 em i bin go long liklik tokples skul ol i kolim, Imboungu. Long dispela taim tu, em i lainim liklik Tok Pisin.

Em i pinisim praimer skul long 1965 na em i go long Awaba Hai Skul long Western Provins long 1966 i go inap long 1969.

Long 1972, Mista Korowi em i pinis tisa trening long Goroka Tisa Koles na long 1973 em i go tis long Mendi Hai Skul long Saten Hailans Provins.

Em i lusim wok tisa long mun Septemba long 1973 na em i stat long wok insait long ofis bilong Minista Bilong Wok long dispela taim em Mista Yano Belo, Memba bilong Erave-Kagua long Saten Hailans Provins.

Mista Korowi wok long ofis bilong Mista Belo i go inap long mun April long 1974.

Em i joinim Depatmen bilong Foren Afea na Tret na i wok hia inap long mun Septemba 1975.

Long dispela taim, Mista Korowi i bin tren long big taun Canberra long Australia long kamap tokman bilong Papua Niugini long ol ausait kantri.

Bihain em holim dispela wok long kantri Belgium long Yurop.

Em i kam bek long Papua Niugini na wok long Port Moresby long mun Septemba long 1976 i go inap long mun Mas 1977.

Long dispela taim em i bin lukautim olgeta wok em Papua Niugini Gavman i bin mekim wantaim Yurop na Afrika.

Mista Korowi i lusim dispela wok long Mun April long 1977 long wanem em i laik sanap long eleksen.

Em i winim Provinsal ilektoret long Saten Hailans na gayman i mekim em Minista bilong Helt.

Mista Korowi i bin lukim ol dispela kantri: Australia, New Zealan, Belgium, Singapore, Thailan, England, Denmak, Frans Luxemburg, Hollan, Switserlan, Britain, Sweden na Itali.

Em i marit na i gat tupela pikinini. Em na famili bilong en save lotu long ol lotu Protestan.

Mista Korowi em i memba bilong PPP.

NUPELA PRIS

Stori i kam long pes wan.

Planti Sister tu bilong Westen Hailans na Enga na Goroka na Madang na Saten Hailans i bin kam long dispela bikpela de. Sampela pipel bilong Australia tu.

Long neks de, em 16 Desemba, nupela Pater Apea Soge i bin mekim Misa namba wan taim long nupela haus lotu bilong Ialibu, em Bisop Schmidt i bin blesim long de namba 14 bilong Desemba. Em i long dispela taim yet ol pipel i bin bung na mekim bikpela selebresen inap tripela de stret. Planti kangal bilong ol kumul i bilasim het bilong ol na taim ol i kam insait long haus lotu olsem, i luk olsem wanpela bikpela kibung bilong ol pisin kumul.

Nupela Pater Simon i gat 30 krismas stret. Mama i bin karim em long yia 1947 long Ialibu yet. Mama i dai pinis long yia 1970 tasol papa i bin stap long dispela bikpela seremoni bilong pikinini bilong em. Pater Simon em i namba wan bilong 7-pela bratasusa.

Pater Simon i bin kisim praimer skul bilong em




long Ialibu, Mendi, na Erave. Haikul bilong em, em i bin mekim long Sen Fidelis Koles long Kap klostu long Alexishafen-Madang.

Bikpela skul tru bilong redi long wok pris stret, em i bin kisim long Holi Spirit Semineri long Bo-

mana long Port Moresby.

Poto antap i soim sil bilong Pater Simon. Long arere em ol liklik stik diwai ol Hailans i yusim olsem sekbuk bilong kaunim ol pik bilong ol. Hia em i min em i kisim bikpela dinau long God....na i laik bekim

THE HOME GUARD FLY TRAP



**Han Tambu
Bilong Pasim Ol
Lang**

Hangamapim dispela botol ausait long haus long ples klia. Marasin bilong em bai pulim ol lang. Ol i no inap go pas na kam insait long haus.

**NUPELA SAMTING.
TRAIM. BAIM.**

Mainland Plumbing Supplies Pty.Ltd.
Aircorps Road, P.O. Box 954
Lae Ring: 42.2633 42.4535

"Rosa em i nambawan bas tru"

Mune Berua,
em i wanpela PMV opareta na bisnisman.




“Mi bin baim wanpela Rosa bas bilong karim pasindia namel long Pt Moresby na Marshall Lagoon. Mi bin salim olpela Rosa bas bilong mi bihain long 2-pela yia, na em i bin raun inap olsem 92,000 kilomita. Mi laikim Rosa tru, em i gat planti pawa, na i save ran gut tru, i nogat wanpela rong i kamap long en, i gat gutpela hap bilong sindaun na planti spes bilong putim kago. Mi yet mi gat bisnis bilong penim haus, na oltaim me save yusim ol dispela trak, Canter na Colt T120. Mitsubishi Fuso trak ol i bilong mi stret.”



TOBA
PTY. LTD.

Rosa inap long karim 25 pasindia olgeta wantaim draiva. Em i nambawan bas tru. Em inap long karim manmeri i go long ples balus, skul, hotel, na planti ol arapela ples



mitsubishi
FUSO

yu laik go long en. Rosa i gat gutpela sia bilong sindaun, em i wankain olsem matras. Em i nambawan bas tru, maski sapos em i yusim petrol o disel. Yes, Rosa em i gutpela bilong olgeta kain samting.

PORT MORESBY Toba/LAE Toba-MADANG Steamships/RABAUL Steamships
KAVIENG Kamsco/BANZ Banz Motor Industries
POPONDETTA Girida Undari Motors/KIMBE A.J. Mueller

GSP TR01P

BEKIM SIKAU

Long wanpela liklik ples ol i kolim Dukutam, wanpela meri tasol i saye stap. Em i gat wanpela liklik pikinini man. Pikinini em i bebi tru.

Long wanpela taim, em i taim bilong pikinini bilong diwai i mau na i pundaun. Na meri ya em i ting long kisim sampela long bus. Na em i karim pikinini bilong em na i go. Em i bihainim wara ol i kolim Urer. Long arere bilong wara em i lukim planti pikinini bilong diwai tru i pundaun na i stap. Em i tok: Mobeta mi hangamapim pikinini long sangana bilong wanpela palai. Na meri i wokabaut i go painim ol pikinini bilong diwai na i go lonwe moa.

Tarangu, lek sangana bilong palai i tait nogut tru, na em i singaut: "He, yu meri kam kisim pikinini bilong yu. Lek bilong mi i pen nogut tru ya. Nogut mi lusim em na i pundaun na i dai." Tasol meri ya i no harim.

Wanpela Sikau, em i boinim skin bilong em long san i stap. Na em i harim palai i singaut i singaut i stap. Na Sikau i ran isi i go, na kisim pikinini, na i ranawe i go long bus.

Sikau i lukautim pikinini long bus, inap pikinini i kamap bikpela boi na em i soim olkain samting long em. Olsem tamiok, banara, paia, na naip. Sikau i bin raun i go

stilim long ol man. Olsem olgeta samting, boi ya i gat. Nau boi ya i wokim wanpela haus bilong tupela, na gaden tu.

Long wanpela taim Sikau i raun i go na em i painim ol yanpela meri i wok long painim-pis long wara i stap. Wanpela liklik brata bilong ol tu i go wantaim ol.

Orait, Sikau i kalap kwik na i stilim purpur bilong namba wan meri, na em i ranawe. Tupela meri i kamaut long wara na i ran pui nating na bihainim Sikau i go. Na tupela meri i salim brata bilong ol i go bek long ples. Tupela meri i bihainim sikau i go na maritim dispela boi ya Sikau i lukautim long en.

Ol lain papamama bilong meri ya i salim liklik boi i go bek long bus na painim tupela susa. Tarangu liklik boi i go na em i painim tupela susa i maritim pinis long man na i stap. Na long morning tupela meri wantaim man bilong ol i kilim wanpela pik givim long liklik boi ya na salim em i go bek long ples.

Sampela yia i go pinis, na i gat bikpela pati i laik kamap long ples bilong tupela meri. Na tupela papamama bilong tupela meri i salim tok long kisim pe bilong tupela pikinini meri i maritim long man long bus. Na liklik brata bilong tupela meri i salim tok long Sikau. Sikau em i



mama bilong man bilong tupela meri.

Orait de i klostu-pinis na ol i kirap i go long pati. Orait, tupela meri i pasim lek han bilong Sikau na pulimapim em long bilum. Na man bilong tupela i no save long sikau, tupela meri i pulimapim, haitim tru, na karim i go.

Taim bilong pati nau, long nait bikpela singsing i kamap. Singsing i go inap long biknait tru, samting, olsem 12.00 o'clock. Nau liklik brata bilong tupela meri ya, em i litimapim sikau, i go antap na em i

tok: "Dispela Sikau em i pe bilong tupela susa bilong mi. Mi laik kaikai nau." Na em i kisim naip na katim nek bilong sikau.

Tarangu, Man bilong tupela meri em i lukim ol i kilim mama bilong em pinis. Olsem bel bilong man ya i nogut tru. Em i krai nogut tru. Long wanem, taim man ya i bebi na sikau yet i lukautim inap em i bikpela man na em i maritim. Orait, long nait yet man ya i ranawe i go bek long ples bilong em. Na long rot em i wokim wanpela bikpela hul tru i go daun moa. Na em i

karamapim long lipdiwai.

Bihain long Pati ol man i laik go bek long ples. Longpela lain manmeri i bihainim dispela rot i kam, olgeta i pundaun long dispela hul na ol i dai. Na long neks de man ya i go lukim na karamapim hul long graun gen. Dispela ples na ol man i kolim nem olsem Bekim Sikau.

Bruno Malai
Usino/Madang



Johnson

AUTBOT

i strongpela

gutpela


poroman

Yu ken baim na ol i ken fiks long:


STEAMSHIPS MACHINERY

na long

OLGETA WOKSAP I SALIM JOHNSON AUTBOT



J2 6h.p.



SUNAM KONA

STRETIM TOK LONG PAWA

Provinsal komisina, Mista Bernard Borok, na namba wan bosman bilong pawahaus bilong Lorengau, Mista Tano, i bin sindaun stretim tok wantaim wan-pela Komiti bilong 8-pela pipel bilong ples Loni long Los Negros Ailan. Ol i gat kros, long wanem Ilektrisiti Komisina i bin katim bus na frut tri na ol kokonas na saksak long wokim rot bilong ilektrik pawa lain i ken ran namel long Lombrum na Lorengau.

Mista Joel Maiah, bilong dispela komiti, i bin tok: ol pipel i orait long gavman i ken taitim pawa lain long hap bilong ol, tasol gavman i mas apim pe liklik long ol samting em i bagarapim long graun bilong ol.

I GAT BISNIS, I GAT WOK

Mista Papi Rasahei, em interim primia bilong Manus Provins, i wok long sakim tok bilong sampela lain man i laik rausim Fishing Kampani long Manus. Ol man i mekim dispela oposisen o tok egens, em ol i bilong Manus Tingting Fran.

Dispela grup i laik Starkist kampani i mas raus, long wanem em i pilim ol i bagarapim solwara bilong ol pipel.

Tasol Primia i no laikim dispela tingting na i bekim olsem: dispela kampani i givim wok long ol yang-pela pipel i winim gret 10 long skul. Sapos i gat moa kampani olsem, bai yumi inap painim wok long ol manmeri i winim skul.

Mista Papi i tok moa, sapos Manus Tingting Fran i gat inap mani na gutpela sapot, orait, em i ken tra-im rausim Starkist kampani. Na Mista Papi Rasahei i bel nogu long dispela kain grup pipel i kirapim divelopmen bilong kantri. Em i tok, gavman i mas kalabusim ol. Ol i save kamapim planti trabel namel long provinsal gavman na bik gavman long Moresby.

NO GAT MANI BILONG BAIM OL TRAK

Mista John Sorrea, siaman bilong bot ov menesmen bilong Lorengau Vocational Senta, i no amamas long Manus Eria Autoriti, long wanem em i no bin givim mani long dispela senta, olsem em i bin askim bipo. Mista Sorrea i laik bai eria auto-

riti i mas baim tripela trak bilong tripela skul: Manus Provinsal Haiskul, Papitalai Haiskul, na Lorengau Vokesenel Skul.

Man ya i tok, ol i laik baim trak, bai ol skul pikinini long ol dispela skul i no mas hatwok wokabaut longwe rot na kisim kani i go i kam long skul na long go bek long ples lukim papamama bilong ol long taim bilong holid.

Ol papamama i save lusim planti mani long baim bensin na kam long PMV na olsem eria autoriti i mas marimari long ol. Mista Sorrea i tok, gavman i bin givim mani pinis na i stap long Rural Impruvmen Fan long han bilong Manus Eria Autoriti. Tasol ol i pasim. Tasol eria autoriti i bekim tok i spik: long dispela taim ol i no gat mani.


BAS KAMPANI PINIS

Mista Allen Burns, bosman bilong Lorengau Bas Sevis, i bin tok olsem, long de namba 30 bilong Desemba ol bas bilong kampani bilong em i no moa karim ol pasindia long rot namel long Lorengau na Lombrum. Em i tok kampani bilong em i lusim planti mani tumas long fiksime ol bas bilong ol na winmani bilong kampani i liklik tumas. Olsem na ol i mas pinisim dispela ran bilong bas.

Nau i gat 5-pela bisnis grup i laik baim ol bas bilong dispela kampani. Tasol Mista Burns i no bin tok yet em i laikim hamas pe bilong baim ol bas.


Aveling Barford Pacific Pty. Ltd. Representing the world's leading automotive manufacturers.

Ume St. Gordon, Port Moresby. Phone 257166, 257908
Morobe Ave. Lae. Phone 424188, Mt. Hagen. Phone 521015
Stones Automotive Services, Kieta. Phone 956093
Malaguna Motors, Rabaul. Phone 921751



NACHI

Bearings—automotive industrial machinery. Roller, ball, taper bearings.
Extra small radial ball bearings.
Single row deep-groove ball bearings.
Double-row self-aligning ball bearings.
Tapered roller-bearings.
Cylindrical roller-bearings.



RYCO-FLEX

Hydraulic hose, assemblies, couplings, adaptors.





Neks de ol i statim bikipela wokabaut mas bilong lusim Isip. Ol i hepi long go bek long ples bilong ol. Long san wanpela bikipela klaut i go pas soim rot...

Long nait wanpela klaut i paia.

Ol i hariap, tasol ol i no bin lusim ting long karim bodi bilong Josep i go wantaim.

Em i bikipela man long Isip, tasol em i laik matmat bilong em i stap long ples.

Bihain long sampela de ol i kamap long Ret Si.

Mipela i pas. Solwara i stap bipo long mipela na ol maunten nabaut.

Bai mipela mekim wanem nau? Mipela bai go we?




Tasol insait long haus bilong Fero.

Yumi longlong, yumi lusim ol Hibru i go. Nau husat bai mekim wok bilong mipela?

Yu wet, i no let tumas yet.

Dispela rot ol i bihainim bai trikim ol.

Gutpela, orait mipela inap go bihainim ol na pasim ol gen. Yu wet, bai ol slev i stap gen long wok.



Ami bilong Fero i kamap long kem bilong ol Hibru.

Lukim, ami bilong Isip i kamap.

I no gat rot bilong ranawe.



Asua bilong yu, Moses. Mipela i pas olgeta.

Watpo yu bringim mipela i kam hia?



Long biknait ensel bilong kilim man i paitim ol Isip



Used by permission of the David C Cook Foundation Copyright 1973 David C Cook Publishing Co. All rights reserved.

SPIT NA SPAK I KILIM MAN

LUKIM GUT DISPELA POTO OL PLISMAN I KISIM



NOGUT NEKS TAIM EM I YU TASOL